

## **Perëndia Është Me Ne** (seria e Krishtlindjes, pjesa 1 nga 4)

Përshëndetje dhe nga unë! Ka filluar atmosfera e Krishtlindjes në festimet e kishës sonë.

Fillojmë serinë e re me 4 pjesë, *Perëndia Është Me Ne*. Këtë Krishtlindje do të fokusohemi vetëm tek një varg. Është vargu që flet për momentin kur Perëndia mishërohet, bëhet njeri dhe banon me ne. Çfarë kuptimi ka për ne kjo gjë? **Perëndia është me ne**, do ta shohim javë pas javë.

Krishtlindja është koha më e veçantë e gjithë vitit; në këtë kohë gjithashtu njerëzit janë më të hapur për të dëgjuar për Perëndinë. Gjatë këtyre katër të dielave, mesazhi do të jetë: çfarë do të thotë, *Perëndia Është Me Ne*. Po e filloj me vargun që do na shoqërojë gjatë këtyre 4 të dielave.

**Mateu 1:23** "*Ja, virgjëresha do të mbetet shtatzënë dhe do të lindë një djalë, të cilit do t'i venë emrin Emanuel, që do të thotë: "Perëndia me ne"!*"

Nga ky varg vjen seria *Perëndia Është Me Ne*. Nëse ti je ndjekës i Jezusit tashmë, e ke shumë më të lehtë të besosh që Perëndia është me ne, është me ty, kur gjërat shkojnë mirë. Sepse kur gjërat shkojnë mirë, është shumë e lehtë të besosh që Perëndia është me ne. Sa herë që merr një lajm të mirë, p.sh.: të bëhet rritje rroge në punë ose bonus për fundviti, *Zoti është i mirë, Ai është me mua*. Kur merr notë të mirë në provim, *Zoti është i mirë, Ai është me mua*. Kur fëmija yt fle gjumë gjithë natën për herë të parë, *Zoti është i mirë, Ai është me mua*. Kur babi thotë mund të shkosh te ajo festa, *ooo me gjithë mend paska Zot, Zoti është i mirë, Ai është me mua*.

Është më e lehtë ta ndjesh praninë e Perëndisë kur gjërat po ecin mirë, kur je në majë të malit. Vendi i vështirë ku ndihet më pak prania e Perëndisë është kur je në luginë, atje poshtë.

Kur gjërat nuk po shkojnë si i prisje, madje kur merr një lajm të keq. Ose kur lëndohesh nga dikush. Kur ndihesh vetëm. Kur shqetësohesh, kur ke frikë, kur të vë para stresi, kur ndjen boshllëkun e depresionit. Sot dua të shohim si mund ta ndjejmë që Perëndia është me ne kur jemi në luginë.

Ajo që më ngjan e çuditshme është se mund të kesh shumë gjëra në jetë që po shkojnë shumë mirë. Kjo po ecën mirë, edhe kjo, edhe kjo. Dhe pastaj, kur vetëm një pjesë e jetës nuk del siç duhet, ajo pjesë sikur peshon më shumë.

Ti je në një ditëlindje, ose po organizon ditëlindjen tënde, ose një festë në

shtëpi. Çdo gjë bukur, shumë qejf, çdo gjë siç e doje, vetëm kur ndodh diçka *baaam*. Dhe gjithë mendja është aty tani.

Ti ishe në majë të malit, çdo gjë super. Ti mezi e prite atë ditë. Dhe *baaam* bie në luginë.

Ajo që ndodhi sikur të vjedh çdo gjë që ti shpresove dhe mezi e prite ta kishe. Ka shumë gjasa që disa prej jush janë në luginë tani. Disa gjëra, disa zona, disa xhepa të jetës, janë yll fare. Martesa po shkon mirë fare, por fëmija ka marrë kot dhe nuk bindet në botë, dhe po lëndohesh shumë.

Lidhja po shkon super, po merreni vesh shumë mirë me njëri-tjetrin, por prindërve nuk u hyn në sy fare ai çuni/goca dhe ty të lëndon shumë.

Ose, ti je shumë afër me Perëndinë dhe e ndjen praninë e Tij shumë afër, por në të njëjtën kohë ke frikë se do të të heqin nga puna, ke frikë që do marrësh notë të ulët në provimin e radhës.

Ose, mezi po pret festat e fundvitit, por pastaj kujtohesh: “Mos, mund të na vijë filani/filania nga shtëpia.” Nuk thashë: “Moosss, mund të vijë vjehri/vjehrra për vitin e ri.” E thashë në përgjithësi. (shaka)

Ose gjërat shkojnë mirë, kur *baaam* ndodh një aksident në familjen e madhe, një kushëri, një në fis. Ose dëgjon një lajm jo të mirë për shëndetin e dikujt. Edhe pse po ndodhin shumë gjëra të mira në shumë zona, vetëm ky lajm të fundos në luginë direkt.

Ajo që dua të shikojmë është, ku është Perëndia kur ti je në luginë? Kur shikon Biblën, lugina përfaqëson shumë gjëra.

Ndoshta ndonjëri mund të jetë në mes të luginës së betejës, luftës, tensionit, përplasjes. Luginë mund të jetë një stinë ose disa muaj depresioni. Luginë mund të jetë kohë vetmie. Por ajo që është e veçanta e kësaj gjëje është se kur je në luginë është koha më e mirë për t'u rritur dhe forcuar si person. Kjo thënie është e bukur:

### **Kur jemi në majë të malit, kënaqemi me Perëndinë, por kur kalojmë lugina e njohim nga afër Atë.**

Ti mund të gëzohesh me Perëndinë, gëzohesh në praninë e Tij kur kalon ditë të bukura. POR kur kalon nëpër lugina e njeh Atë në një formë tjetër. Do shikojmë Psalmin 84, shiko si thuhet te Psalmi 84, lexojmë vargjet 5-7 dhe të shikojmë se ku është Perëndia kur ti je në luginë.

**Psalmet 84:5-7** *'Lum ata që e vënë (që e gjejnë) forcën e tyre te ti dhe kanë në zemër rrugët e tua! Kur kalojnë luginën e Bakas, e shndërrojnë atë në një vend burimesh, dhe shiu i parë e mbulon me bekime. Ata kalojnë nga një forcë te tjetra dhe në fund paraqiten para Perëndisë në Sion.'*

Lugina e Bakas. Çfarë është kjo luginë? Në këtë luginë ka shumë pemë dhe është një pemë që lëshon një lloj dylli, një lloj lëngu dhe duket sikur pema po qan. Prandaj në Bibël kjo luginë është përkthyer me disa emra: Lugina e Lotëve, Lugina e Vajtimit, Lugina e Humbjes.

Kur lexon në Bibël për luginat, gjithmonë ka të bëjë me një vend të vështirë ose të rrezikshëm. Vendi që do ketë gjemba ose kafshë të egra ose njerëz që mund të kishin zënë pritë për të grabitur dikë. Në fakt, rrallë ndodhte që të kaloje nëpër një luginë dhe të mos pësoje ndonjë gjë. Luginat ishin vende të vështira, por vargu thotë:

**Psalmet 84:5** *'Lum ata (të bekuar janë ata) që e vënë forcën e tyre te ti dhe kanë në zemër rrugët e tua!'*

Sa bukur e thotë!

Nëse nuk je ndjekës i Jezusit jemi shumë të gëzuar që ke ardhur në këtë festim. Nëse nuk e njeh Perëndinë personalisht, ka mundësi që do të kesh ditë që do të thuash: “Nuk duroj dot më, vdiqa, jam i rraskapitur, nuk më del asgjë si dua.” Nëse nuk e njeh Perëndinë personalisht, ajo që të mbetet është vetëm ajo që ke. Por nëse je ndjekës i Jezus Krishtit, ti ke fuqi përtej fuqisë tënde. Je i lidhur me fuqinë hyjnore, prandaj thotë Psalmisti: 'Lum ata që e kanë gjetur fuqinë tek Ai.' Fuqia e Shpirtit të Shenjtë është në dispozicionin tënd, kur ti zgjedh t'i besosh Jezus Krishtit.

Lajmi i mirë është, nëse je ndjekës i Krishtit, ti ke një energji më të madhe. Perëndia yt të fuqizon çdo ditë, por sidomos kur ti has fundin, sepse fuqia e Tij përsoset në dobësi.

Nëse je në mes të një luginë, nuk ke pse e kalon vetëm. Lidhu me fuqinë e Perëndisë, që është gati të jetë afër teje në kohë nevoje. Lum ata që kanë vënë forcën e tyre te Perëndia, ata që e kanë gjetur forcën e tyre te Perëndia.

Vargu nuk thotë, 'Lum ata që ia dalin vetëm', apo 'që janë të vendosur', apo 'që janë të zotë.'

Ajo që po ndodh sot kudo është se po lartësohet më shumë se kurrë fryma e pavarësisë. “Nuk kam nevojë për njeri. Jam i pavarur nga prindërit, jam mirë

vetëm, ia dal vetëm. Nuk më duhet Perëndia, nuk më duhet askush.” Por ne nuk jemi krijuar që të jemi të pavarur. Jemi krijuar të jemi të varur dhe të lidhur me Perëndinë dhe njëri-tjetrin. Lum ti, i bekuar je ti, kur e kupton nevojën për Perëndinë dhe je i lidhur me një fuqi përtej fuqisë njerëzore.

Fundi i vargjeve thotë: '... në fund do të shkoj, do të arrij në Sion, para Perëndisë.' Sepse tempulli i Perëndisë ishte vetëm në Jeruzalem; aty ishte prania e Perëndisë dhe për të shkuar aty duhet të kaloje nëpër Luginën e Lotëve.

Si thotë vargu, jo vetëm 'Lum ata që kanë gjetur forcën te Perëndia', por edhe 'Lum ata që kanë vënë zemrën në rrugët e tua', që kanë në mendje të shkojnë, të ecin drejt Perëndisë.

Çfarë do të thotë kjo më troç? Pali tha të njëjtën gjë te

**Kolosianëve 3:3** *'sepse ju keni vdekur dhe jeta juaj është fshehur bashkë me Krishtin në Perëndinë.'*

Ki në mendje gjërat e Perëndisë.

Pastaj te Filipianëve, Pali vazhdoi të njëjtin mendim:

**Filipianëve 4:8** *'Së fundi, vëllezër, të gjitha gjërat që janë të vërteta, të gjitha gjërat që janë të ndershme, të gjitha gjërat që janë të drejta, të gjitha gjërat që janë të pastra, të gjitha gjërat që janë të dashura, të gjitha gjërat që janë me famë të mirë, nëse ka ndonjë virtyt dhe nëse ka ndonjë lëvdim, këto mendoni.'*

Pavarësisht se ku je, më shumë rëndësi ka se çfarë po mendon, jo se ku ndodhesh, sepse jeta ka uljet dhe ngritjet e saj. Herë do jesh lart në mal, herë do jesh në luginë, por më e rëndësishme është ku e ke mendjen dhe çfarë mendimesh po lejon në kokë.

P.sh.: Një natë s'po më zinte gjumi. Ma do mendja që po kthehesha një herë në një anë, një herë në tjetrën. Gruas sime i del gjumi dhe më thotë, 'Çfarë ke, a je mirë?' 'Mirë jam, por nuk po më zë gjumi.' 'Nuk të zë gjumi?' Dhe mu afrua, 'Po çfarë ke more zemër, ti ke paqen e Perëndisë, lëria Atij meraqet. Lërja Perëndisë, Ai do të merret me të gjitha, dhe në kohën e Tij do i japë drejtim çdo situatë.' Kthehet në krahun tjetër dhe ia futi gjumit gruaja. Po kjo, mor vëlla, çfarë frymëzimi në mes të natës. Edhe pse një sy hapur, një mbyllur, përsëri është frymëzuese. Dhe duke ia lënë Perëndisë meraqet e mia, ashtu më zuri gjumi. Gruaja ime kishte të drejtë, ajo që mendon ka

shumë rëndësi.

Ndoshta këtë ka nevojë të dëgjojë dikush sot. Ndoshta ti je në luginë, por mendja jote mund të jetë te Perëndia, e lidhur me Perëndinë.

Ndoshta ke shumë për të bërë deri në fund të vitit, je nën presion ose po kalon ditë të vështira, por mendjen mbaje te Perëndia. Ai është me ty.

Ai që është me ty është më i madh se ai që është në botë. Perëndia yt shkon para teje për të përgatitur rrugën për ty. Fryma e Tij të jep forcë kur je i dobët. Ti ke nevojë çdo ditë për Të. Fjala e Tij është si një llambë në këmbën tënde dhe një dritë në shtegun tënd.

Mund të jem në luginë, por mendjen e kam te Perëndia. Jam rrugës për te vendi i çlodhjes me të.

**Psalmi 84:6** *'Kur kalojnë luginën e Bakas, e shndërrojnë atë në një vend burimesh, dhe shiu i parë e mbulon me bekime.'*

Me fjalë të tjera, ti mund të jesh në luginë sot, por aty nuk është destinacioni yt. Lugina është thjesht një pjesë e udhëtimit, nuk është fundi aty. Perëndia do të të nxjerrë nga lugina. Davidi tha të njëjtën gjë te Psalmi 23.

**Psalmi 23:4** *'Edhe sikur të ecja në luginën e hijes së vdekjes, nuk do të kisha frikë nga asnjë e keqe, sepse ti je me mua; shkopi yt dhe thupra jote janë ato që më japin zemër.'*

Ti mund të jesh në luginë, por je duke ecur nëpër të, nuk je rehatuar aty, Perëndia është me ty dhe do të të nxjerrë nga aty.

Mund të jesh i lënduar, por nuk do zgjasë gjithmonë. Perëndia do të të nxjerrë që aty.

Kur je në këtë pikë, të vjen të ulërasësh: *'Perëndi, më nxirr nga kjo situatë tani, largoje këtë situatë tani. Boll, s' duroj dot më.'* Nganjëherë paqja e Perëndisë vjen pasi kemi kaluar luginën. Si ishte vargu 6...

**Psalmi 84:6** *'Kur kalojnë luginën e Bakas, e shndërrojnë atë në një vend burimesh, dhe shiu i parë e mbulon me bekime.'*

Shndërrohet në vend burimesh. Kur ishin në vende të thata, çfarë bënin njerëzit? Hapnin puse për të nxjerrë ujë. Është sikur Perëndia do të thoshte

një gjë të tillë:

*Më trego besimin tënd dhe Unë do të të tregoj besnikërinë Time. – Perëndia.*

Sikur Perëndia thotë: Nëse ti pret që Unë të vij, Unë kam për të ardhur. Nëse përgatitesh për Mua, Unë aty do jem.

Jezusi e filloi këtë muhabet te Dhjata e Re kur Jezusi u takua me një burrë me dorë të tharë. Në vend që të thoshte, “Unë do të të shëroj tani,” Ai tha, “Ti shtrije dorën dhe Unë do ta shëroj.” Me trego që ti beson se Unë mund ta bëj dhe Unë do e bëj.

Një herë tjetër, Jezusi takon një burrë që nuk kishte ecur për 38 vjet. Jezusi nuk tha, 'Në emrin Tim shërohu tani.' Jo, Ai tha, 'Merr vigun tënd dhe ec.' Çohu dhe më trego që ti beson dhe Unë do të të shëroj dhe ti do ecësh. Nëse ti tregon besimin tënd, Unë do të tregoj besnikërinë time.

Nëse do mbjellësh, Ai do e bëjë të rritet. Fara mbillet shumë muaj para se të vijë koha e korrjes. Nëse do lutesh, Perëndia do e dëgjojë dhe do përgjigjet.

Kur je në tokë të thatë hap një pus. Ti përgatitesh për të përjetuar praninë e Perëndisë dhe mënyrën se si do të veprojë Ai. Më trego besimin dhe unë do tregoj besnikërinë.

Një premtim i bukur në Bibël, 'Afrohuni Perëndisë dhe Ai do t'ju afrohet juve.' Trego që ti beson tek Unë dhe Unë do vij me praninë Time te ti. Më kërko dhe do të më gjesh, trokit dhe do të hapet.

### **Qëndroni në heshtje dhe kuptoni që unë jam Perëndia.**

Perëndia rrallë u flet njerëzve që e kanë me të shpejtë. Kur Moisiu ishte te shkurrja që digjej, nuk ndodhi kështu: Moisiu ishte me makinë, po ikte me 100 km në orë dhe pa *ooo një shkurre po digjet, prit ta bëj Instagram Story, po digjet një shkurre. Prit ta shikoj kush hyri, kush po e shikon...*

Jo, Perëndia i tha, 'Rri ca këtu me mua. Hiqi sandalet se je në tokë të shenjtë. Rri pak, qetësohu, qëndro në heshtje dhe kupto dhe prano që unë jam Perëndia. Nëse ti do më afroresh Mua, Unë do të të afrohem ty.'

Ndoshta për dikë mund të jetë kohë përgatitjeje. Thuaj, 'Perëndi, unë dua të të takoj Ty. Unë do të të pres Ty. Unë do të besoj që Ti do ta shfaqësh veten te unë, sepse unë kam shumë nevojë për Ty dhe praninë tënde.' Dhe kur mbushesh me Të, ti ngjitesh përsëri në majë të malit. Për shkak se e takojmë Perëndinë kur jemi në luginë, ne e shijojmë praninë e Tij kur jemi në majë të

malit. Por ama, për ta njohur si duhet ndodh kur jemi në luginë.

Dua të kujtoni se Perëndia nuk na ka premtuar fushë me lule, nuk na ka premtuar që s'do kalojmë lugina.

**Perëndia nuk ka thënë që nuk do të kalojmë lugina. Por nuk ke pse i kalon luginat vetëm.**

Perëndia është me ne. Si ishte vargu që e filluam...

**Mateu 1:23** *"Ja, virgjëresha do të mbetet shtatzënë dhe do të lindë një djalë, të cilit do t'i venë emrin Emanuel, që do të thotë: "Perëndia me ne"."*

Për mua ky vit ka qenë si të ecësh nëpër një luginë të tillë. Vdekja e papritur e mamit tim ishte një goditje shumë e fortë. Por ndërkohë, ka qenë viti që jam afruar më afër me Perëndinë. Jam lutur më shumë se çdo vit, kam studiuar Biblën me nge, dhe Zoti më ka mësuar se çfarë do të thotë 'Hiri Im të mjafton.'

Perëndinë e njohim më shumë kur jemi në luginë, aty Ai na tregon karakterin e Tij. Ndjejmë fuqinë e Tij në një mënyrë që nuk e kishim ndjerë më parë. Aty, në ato momente, kur i vetmi që ke është Perëndia.

Ndoshta po ndihesh i dobët para situatave, jetës. Kush është Perëndia për ty? Kur je ti i dobët, Ai është i fortë. Kur ti je në errësirë, Ai është Drita jote. Kur ti je i stresuar dhe i shqetësuar, Ai është gëzimi yt. Kur ti je i lënduar, Ai është ngushëlluesi yt.

Kur kalojmë nëpër lugina, ne nuk kemi frikë, sepse Ai është me ne. Ai do të na udhëzojë hap pas hapi se si të dalim nga lugina. Ai është i mirë, Ai është me ne.

Kur e shikon që nuk po ia del dot, lëshohu në krahët e Tij.

Le të lutemi!

Lutja e shpëtimit!